

徐氏
寶
種

三字經訓詁

歙西徐士業建勲氏校刊

宋儒王伯厚先生作三字經以課家塾言
簡義長詞明理晰淹貫三才出入經史誠
蒙求之津逮大學之濫觴也予不揣荒陋
謬為訓詁不無貽誚高明然於稗習之助
庶或有小補云爾歲在康熙丙午嘉平之
吉訥菴王相晉升甫識

人之初 性本善

此立教之初發端之始。故本於人之初生而
言之。天之所生謂之人。天之所賦謂之性。秉
彝之良謂之善。人生之初始有知則先識其母。
始學語則先呼其親。孟子曰。孩提之童。無不知
愛其親也。及其長也。無不知敬其兄也。朱子曰。
人性皆善。不其然乎。

性相近 習相遠

此承上文而言。孔子曰。性相近也。習相遠也。
言人初生時。智愚賢不肖皆同此性。本

相近而無別也。及乎知識既開。氣稟各異。資之敏者則為智。識之闇者則為愚。循乎理者則為賢。縱乎欲者則為不肖。反之秉彛之善性。不既大相遠乎。此無他。習氣使然也。惟君子為能有養正之功。而不使幼穉之性。移於不善也。

苟不教

性乃遷

教之道

貴以專

養正之謂何。謂祇教也。人非聖人。豈能生知。非親不有。非教弗成。有子而不教。則昧

其天賦之良。悖理縱欲。日遷于不善矣。教之何如。古者婦人有娠。坐不偏。卧不側。立不跛。倚行不亂。步目不視惡色。耳不聽淫聲。不出亂言。不食邪味。嘗行忠孝友愛慈良之事。往往生子聰明。才智賢德過人。此未生之胎教也。子能食。教以右手。能言。勿使嬌聲。能行。使知四方上下。能揖。教以禮讓尊親。此阿保母氏之教也。至於洒掃應對進退之節。禮樂射御書數之文。此父師之教也。然教之之道。又貴在專而無倦。蓋不專則學難成就。倦教則子益廢弛。非教之善道也。○娠音身。

昔孟母

擇鄰處

母氏之教本於慈。由與而人教之所宜先也。古之賢母能教子以成大名者。惟孟母最著。孟子名軻字子輿。戰國鄒人也。父早喪。母仇氏。居近屠肆。孟子幼嘗嬉戲其間。學為屠人宰割之事。孟母曰。此非可以居子也。乃遷於郊。居近墳塋。孟子又學為埋葬。哭泣之戲。孟母曰。此亦非可以居子也。又遷於學宮之旁。孟子曰。夕學為揖讓之禮。進退周旋之節。孟母曰。此可以教吾子矣。遂安居焉。古語云。交必擇友。居必擇隣。孔子曰。里仁為美。擇不處仁焉。得智。其此之謂乎。○仇音掌。

子不學

斷機杼

杼者織機之梭。孟母乎居。以織紡為事。孟子稍長。出從外傅。偶倦而返。孟母引刀自斷其機。孟子懼跪而請問。母曰。子之學猶吾之織也。積絲成寸。積寸成尺。尺寸不已。遂成丈疋。今子學為聖賢。乃厭倦而求歸。猶吾織布未成。而自斷其機也。孟子感悟。乃往受業於子思之門。紹明聖學。皆母教也。○杼音暑。

竇燕山有義方

為父之教。本於嚴。以正而訓。教之不可忽也。近代之嚴父。能教諸子皆成。令名者惟竇氏為最。竇禹鈞。幽州人。以地屬燕。因號燕山。其為訓也。家庭之禮。肅於朝廷。內外

之防嚴於宮禁父子之訓凜於官師左傳
石碻曰愛子教以義方弗納干邪如燕山
之教可謂義方也已○碻音雀

教五子

名俱揚

燕山五子儀儼侃偁僖宋初皆為名臣銳
鄉世守其父之家法奕葉貴顯皆嚴親訓
迪之功也○偁音稱迪音惕

養不教

父之過

父母之於子不患不慈但患失教
有子而不能教豈非父之過乎

教不嚴

師之惰

師長之於弟子。不患無教。但患不嚴。不嚴則弟子怠。翫而不遵。志業廢矣。此為師之過也。

子不學

非所宜

幼不學

老何爲

古語云。養子不敢父之過。訓導不嚴。師之

惰。父教師嚴。兩無外。學問無成。子之罪。又曰。勿謂今日不學。而有來日。今年不學。而有來年。日復一日。年復一年。嗚呼。老矣。是誰之愆。言悔之無及也。

玉不琢

不成器

人不學

不知義

義。道義也。禮經學記曰。玉不琢。不成器。人不學。不知道。雖有美玉。不琢不磨。不成器。物。則無所用。猶人。雖有美材。不勤學問。則不能知理義道德。終不可謂成人也。

爲人子

方少時

親師友

習禮儀

此言爲子弟之道也。凡爲人子弟。當少年無事之時。宜當親近明師。交結良友。講習禮節儀文之事。愛親敬長之道。進德修業。以爲立身之本。

香九齡

能溫席

孝於親所當執

百行之首。以孝爲先。初學之士。不可不知也。昔漢時。有江夏黃香。年九歲。卽知孝於親。每當夏日炎熱之時。則扇父母之帷帳。使枕席清涼。蚊蚋遠避。以待親之安寢。至於冬日嚴寒。則以身溫暖其親之衾裯。枕席。以待親之煖卧。幼而行孝如此。雖云天性。然人子之道。昏定晨省。冬溫夏清。禮當然也。○清音靜

融四歲能讓梨

弟於長

宜先知

敦倫篤誼。友于為重。兄弟之義。幼學所宜知也。漢時魯國孔融。年始四歲。即知友愛。敬讓之道。時有饋送其家梨一筐。諸兄競取之。融獨後。又擇其最小者。取之。人問爾何獨取小者。荅曰。我本小兒。當取小者。即此可觀其謙恭敬讓之一端。日後懼鈞黨禍。兄弟一門爭死。其孝友之風。燦然千古矣。

首孝弟

次見聞

知某數

識某文

孝弟之道。人倫所當盡。見聞之理。幼學所宜知。子曰。行有餘力。則以學文。知其目。則為數。識其義。則為文。易曰。君子多識前言往行。曰新其德。孔子曰。多聞闕疑。慎言其餘。多見闕殆。慎行其餘。及乎聞見既廣。知識既深。則言寡尤。而行寡悔矣。

一而十 十而百

此以下。皆言知某數也。萬物之數。起於一。一者。數之始。十者。數之終。百者。十之盈也。

百而千 千而萬

十累而盈。滿十則為百。百累而盈。滿十則為千。千累而盈。滿十則為萬也。遇此以往。數無紀極。莫之能窮也。

三才者 天地人

混沌之氣。輕清者上浮而為天。重濁者下凝而為地。天地之間。萬物羣生。惟人最貴。人為萬物之靈。氣稟陰陽。道敦化育。生生不息。與天地參。故曰三才。

三光者

日月星

日本乎陽之精。照臨于晝。月本乎陰之魄。光明于夜。五星列宿。皆麗乎天。輝煌燦爛。布列森羅。配乎日月。謂之三光也。

三綱者

君臣義

父子親

夫婦順

綱者。統系也。天下之大綱有三。君正於朝。

為臣之綱。父正于家。為子之綱。夫正于室。為妻之綱。三綱既正。則君聖臣良。父慈子孝。夫和婦順。宇宙清寧。邦國平康矣。

曰春夏

曰秋冬

此四時

運不窮

此言歲時之序也。一歲之序分為四時。應乎北斗。斗柄東指。在寅卯辰。萬物發生。於時為春。斗柄南指。在巳午未。萬物楊茂。於時為夏。斗柄西指。在申酉戌。萬物收斂。於時為秋。斗柄北指。在亥子丑。萬物閉藏。於